

Vnd wer dises nicht weiß/ der wirt wie ein Blinder. Derhalben beschließ das Glas wol mit sigillo Hermetis, das nichts darvon rauchē könne. Dann die Spiritus seindt bereit zur flucht/ wie sie vngeschickt getrieben werden/ haben derhalben etliche das geschirz beschlossen mit Leimen / mit sals angemacht: Etliche mit andern ding als mit cerussa, minio, bolo Armeno, vnd habens mit flüssigem Firneuß starck angemacht / vnd auff ein Marmelstein gerieben/ vnd seindt endlich alle betrogen worden. Ich aber sage dir/ das mit keinem ding das geschirz besser mag beschlossen werden/ denn mit Glas. Besehe dich derhalben zu erfinden dises heimliche Sigill. Dann ohn das selbe kan das Magisterium nicht verricht werden. Es ist aber ein zweyfacher weg. Der erste ist das man den hals krümme: dann man legt ein Zigel mit einem loch zu dem hals des geschirz / vnd vber den Zigel legt man äschen mit kolen biß der hals glüet: darnach trucket man den hals mit glüenden zangen zusammen/ vnd drehet in wie der Tractatus lucis lehret. Vnd diß ist eigentlich sigillum Hermetis. Es muß aber der hals zimlich lang sein/ vnd in mit grosser fürsichtigkeit glüen/ also das die materi vnden in dem geschirz mit nichten verleset werde. Der ander weg ist also: das man den hals oben wol heiß mache / vnd darnach geflossen glas mit starcken feur / darumb schlage vnd wol vermache. Vnd als dann soll das geschmelzte glas vnder dem loch des hals einen gläsern circel oder ring zwen finger dick haben an dem ort da man den Alembic auffsetzet / eben so groß oder hoch das er fein geschickt in das loch des vndern Brinals gehe per oppositum, wie in andern distillationibus wie in via universalis gelehrt wirt / vnd darnach mit geschmelztem glas wie ich vor gesagt vmb vnd vmb beschliessen.

C A P V T X V I I I .

Daß der Ofen/ den man Althanoz nennet / von nöthen sey.

**N**icht weniger soll auch der Ofen bequem sein / in den man das geschirz mit der materi stellet vnd kochet. Dann droben ist gesagt worden daß das ganze Regiment vnser Meisterschafft vnd vnser Werck an dem feur/ geschirz vnd beschliessung gelegen sey. Dann ohn dieselben kan vnser Meisterschafft nicht volbracht werden/ wie außdrucklich in lib. Saturni gesagt wirt: ein gebürlich feur kan gewißlich nit zugefügt werden/ dan es sey der Ofen darzu geschickt vnd bequem. Muß derhalben ein Künstler (nach dem spruch Morieni) des feurs qualitet